

Evening Dogri News Bulletin,

01 July 2024 18:15 Hrs

Headlines

- गृह मंत्री अमित शाह होरें आखेआ ऐ जे अज्जै थमां लागू त्रै नमें आपराधिक कनून तुरत न्या ते पीड़ितें दे हक जकीनी बनाडन।
- उपराज्यपाल मनोज सिन्हा होरें घोषणा कीती ऐ जे त्रै नमें आपराधिक कनून देसै गी आपराधिक न्या प्रणाली गी औपनिवेशिक जुग दी मानसिकता थमां मुक्त करडन। उ
- प्रधानमंत्री नरेंद्र मोदी होरें डिजिटल इंडिया पहल दे नौ बरे कामयाबी कन्नै पूरे होने दी सराहना कीती।
- संसद दे दौनें सदनें दी सांझी बैठक च राष्ट्रपति द्रोपदी मुर्म हंडे अभिभाषण पर धन्नवाद प्रस्ताव पर चर्चा जारी।

<><><><><><>

Shah-Criminal Laws

केंद्री गृह मंत्री अमित शाह होरें आखेआ ऐ जे अज्जै थमां लागू होए दे 3 आपराधिक कनून देसै च आधुनिक आपराधिक न्या प्रणाली दी नुमायंदगी करंगन ते इंदे कन्नै तुरत न्या ते पीड़ितें दे हक्क यकीनी बनडन। उनें गलाया जे आपराधिक न्याय प्रणाली हुन पूरी चाल्ली स्वदेशी ऐ। श्री शाह होर अज्ज नमीं दिल्ली च 3 आपराधिक कनूनें बारै जानकारी देआ रदे हे। गृह मंत्री होरें आखेआ जे पहले शडे पुलिस दे हकें दी राखी कीती जंदी ही, पर हुन पीड़िते शकैत करने आहले दे हकें दी बी रक्षा होग। गृह मंत्री होरें आखेआ जे सरकारै देश विरोधी गतिविधियें खलाफ नमें प्रावधानें कन्नै राजद्रोह कनूनें गी खत्म करी दितता गोआ ऐ। उनें आखेआ जे नमें कनूनें च महिलाएं ते बच्चें खलाफ अपराधें गी प्राथमिका दिती गेई ऐ। श्री शाह होरें इब्बी दस्सेया जे सामूहिक बलात्कार ज्नेय अपराध लेई हुन 20एं बरें दी कैद या आजीवन जेल दी सजा होग। उनें गलाया जे नाबालिग कन्नै बलात्कार लेई मौत दी सजा दिती जाग। श्री शाह होरें दस्सेया जे नमें कनूनें च भीड़ दी हिंसा दे खलाफ बी प्रावधान ना। गृह मंत्री होरें आखेआ जे विपक्ष इनें कनूनें बारै गलत जानकारी फला करदा ऐ।



LG-Criminal Laws

लेफ्टिनेंट गवर्नर मनोज सिन्हा होरें आखेआ ऐ जे त्रै नमें आपराधिक कनून मुल्ख दी आपराधिक न्याय प्रणाली गी उप निवेशिक दौर दी मानसिकता थमां आजादी दोआंगन। उनें आखेआ जे अज्जै थमां लागू होए दे एह नमें कनून भारत दी आपराधिक न्याय प्रणाली च व्यापक तब्दीलियां आह्मडन। एह त्रै नमें कनून-भारतीय न्याय संहिता, भारती नागरिक सुरक्षा संहिता ते भारती साक्ष्य अधिनियम बिलतरतीब आई.पी.सी, सी.आर.पी.सी ते इंडियन एक्टिविडेंस एक्ट दी थाहर लैडन। एल.जी सिन्हा होरें आखेआ ऐ जे ओह जम्मू-कश्मीर पुलस गी मुबारकबाद दिंदे न जिनें ऐकडे नमें कनून तैहत पैहली एफ.आई.आर दर्ज कीती ऐ। पिच्छले 4 बरे दरान बक्ख-बक्ख सरबंधत धडें कन्नै व्यापक सलाह सूत्र दे मगरा इनें त्रौनें नमें कनूनें गी लागू कीता गेआ ऐ। इस कार्यक्रम च जम्मू-कश्मीर ते लद्दाख हाईकोर्ट दे मुख्वा न्याधीश जस्टिस एन. कोटीश्वर सिंह, सलाहकार आर.आर भटनागर, मुख्वा सचिव अटल डुल्लु ते जीजीपी आर.आर स्वैन होरें बी हिस्सा लैता।



Reasi-Criminal Law

3 नमें अपराधिक कानून भारती न्याय संहिता, भारतीय नागरिक सुरक्षा संहिता ते भारतीय साक्ष अधिनियम अज्ज पहली जुलाई थमां समूलचे देसै च लागू होई गेन। उधमपुर-रियासी रेंज दे डी.आई.जी रईस मोहम्मद भट्ट आखेआ जे पुलस त्रैवे नमें कनूनें गी लागू करने लेई पूरी चाल्ली तैयार ऐ। नमें आपराधिक कनूनें गी समझने ताई कमियें गी लोडचदी सिखलाई दिती गेई ऐ। डी.आई.जी रईस मोहम्मद भट्ट होरें आखेआ।

.....बाईट.....



Poonch-Criminal

जम्मू-कश्मीर पुलस आस्सेआ पुंछ च 3 नमें आपराधिक कनूनें गी लागू करने मौके जागरूकता कार्यक्रम दा सरिस्ता कीताग गेआ। डिग्री कालेज पुंछ दे आडीटोरियम च लग्गे दे इस कार्यक्रम दी प्रधानता जम्मू-कश्मीर दे उपराज्यपाल मनोज सिन्हा होरें वर्चुअल ढंग्गे नै कीती। अपने संबोधन च एल.जी होरें कनूनी ढांचे गी मजबूत

करने ते सब्बै नागरिकें ताई न्याय जकीनी करने च इनें नमें कनूनें दे महत्वै पर जोर पाया। कार्यक्रम च डीडीसी ताजीम अख्तर, पुंछ दे डी.सी यासीन एम. चौधरी ते एसएसपी युगल मन्हास हुंदे सनें पुंछ दे मन्ने-परमन्ने दे लोकें शिरकत कीती। स्हाढे जिला संवाददाता अनुभव मिसरी हुंदे कन्नै गल्ल करदे होई एसएसपी युगल मन्हास होरें आखेआ।

<><><><><><>

ADGP-Criminals Laws

जम्मू दे ए.डी.जी.पी आनंद जैन होरें अज्ज आखेआ जे देश च लागू कीते गेदे 3 नमें आपराधिक कानून केंद्र शासित प्रदेश च पाकिस्तान प्रायोजित आतंकवाद कन्नै निब्वडने च पूरी चाल्ली समर्थ ना। इंदे कन्नै भारत दी आपराधिक न्या प्रणाली च दूरगामी बदलाव आए ना। भारतीय न्या संहिता, भारतीय नागरिक सुरक्षा संहिता ते भारतीय साक्ष्य अधिनियम नै बिल तरतीब ब्रिटिश कालीन भारतीय दंड संहिता, दंड प्रक्रिया संहिता ते भारतीय साक्ष्य अधिनियम दी थाहर आने गेन।

<><><><><><>

Army-Staff

सेना प्रमुख जनरल उपेंद्र द्विवेदी होरें अज्ज नमीं दिल्ली च राश्ट्रीय युद्ध स्मारक पर फुल चाढियै कर्तव्य निभांदे होई अपनी जिंदु दा बलिदान देने आहले दिलेर जवानें गी श्रद्धांजलि भेंट कीती। मीडिया कन्नै गल्ल करदे होई जनरल द्विवेदी होरें आखेआ जे भारतीय फौज दी नुमायंदगी करने दा मौका थोहना उंदे लेई बडे गै मान आहली गल्ल ऐ। श्री द्विवेदी होरें सेना दे आधुनिकीकरण दा आह्वान कीता ते आखेआ जे सेना आत्मनिर्भरता ताई स्वदेशी पहल, प्रणालियें ते उपकरणें गी बढावा देग। जनरल द्विवेदी होरें देसै दे बसनीकें गी भरोसा दोआया जे भारतीय सेना सब्बै चुनौतियें दा सामना करने लेई तैयार ते पूरी चाल्ली समर्थ ऐ।

<><><><><><>

Gas-Price

तेल कंपनियों कर्मिश्यल एलपीजी गैस सिलेंडर दे भा च 30 रुपें दी कटौती कीती ऐ। 19 किलो दे कमर्शियल सिलेंडर दी कीमत च कीते गेदा बदलाव अजें थमां लागू होई गोआ ऐ। कीमतें च कमी करियै दिल्ली च इस सिलेंडर दा परून भा हुन 1,646 रपे होगा।

<><><><><><>

ते हुन बाकी दिएं खबरें कन्नै विजय बजाज।

PM Digital India

प्रधानमंत्री नरेंद्र मोदी होरें डिजिटल इंडिया पैहलकदमी दे 9 बरे कामयाबी कन्नै पूरे होने दी सराहना कीती ऐ। सोशल मीडिया दी इक पोस्ट च श्री मोदी होरें आखेआ जे डिजिटल इंडिया सशक्त भारत दा प्रतीक ऐ। उनें पिच्छले दहाके दरान इस दिशा च पुट्टी गेदी बड्डी गैहीं दा बी जिक्र कीता। डिजिटल इंडिया अभियान दे चलदे हुन 11 करोड़ शा मते करसानें गी पैसा सिद्दे उंदे बैंक खातें च थ्होआ करदा ऐ ते एहू गिनतरी कनाडा ते फ्रांस दी सांझी आबादी कोला बी मती ऐ। 137 करोड़ शा मते आधार नंबर कायम कीते गेदे न जेड़े करोड़ों बद्दे लोकें गी डिजिटल शिनाख्त उपलब्ध करोआ करदे न। एहूदे अलावा डिजिलॉकर राहें 674 करोड़ शा मते दस्तावेज जारी कीते जाई चुके दे न। भारत नेट नै 6 लक्ख 83 ज्हार किलोमीटर दे ओपटीकल फाइबर दा नेटवर्क बछ्छाए दा ऐ जेड़ा पूरी धरतै दे 17 बारी चक्क लाने कोला बी मता ऐ। यूपीआई दे लैन-देन दर्ज कीते गेदे न। 34 करोड़, 60 लक्ख शा मते आयुष्मान कार्ड बनाए गेदे न ते एहू आंकड़ा पूरे अमरीका दी आबादी कोला बी मता ऐ। मुल्ख च 9 करोड़ शा मते फास्ट-टैग जारी कीते गेदे न जेड़े 2023 च पूरी दुनिया च बनाई गेदी गड्डिएं दे आंकड़ें दे तकरीबन बरोबर न।

<><><><><><>

Parliament Motion of Thanks

संसद दे दौनें सदनें दी सांझी बैठक च राष्ट्रपति द्रोपदी मुर्मू हुंदे अभिभाषण पर धन्नवाद प्रस्ताव पर चर्चा जारी ऐ। भारतीय जनता पार्टी दे सांसद अनुराग सिंह ठाकुर होरें चर्चा च हिस्सा लैंदे होई पिच्छले 10 बरें च सरकार आस्सेआ बक्ख-बक्ख क्षेत्रें च कीती गेदी पहलकदमिएं दी सराहना कीती। उनें आखेआ जे अर्थ बवस्था च बाद्दे ते लोकें दी भलाई बेहतरी आस्तै प्रधानमंत्री नरेंद्र मोदी हुंदी नुमायंदगी च सरकार नै नेकां गैई पुट्टियां न। श्री ठाकुर होरें आखेआ जे 25 करोड़ लोकें गी गरीबी थमां उबारेया गोआ ऐ। उनें आखेआ जे सरकारै प्रधानमंत्री गरीब

कल्याण अन्न योजना तैहत 80 करोड़ लोकें गी मुफ्त अनाज दित्ता ऐ। श्री ठाकुर होरें गलाया जे गरीब लोकें लेई 4 करोड़ घर ते 12 करोड़ शौचालय बनाए गेन। अर्थ बवस्था च तेजी आनने गित्तै कीती गेदी पहलें गी लेइए उनें आखेआ जे पिछले 10 बरें च बैंकें दी रास-पूंजी च केई गुणा बाद्दा होआ ऐ। संयुक्त प्रगतिशील गठबंधन यूपीए दे शासन दौरान देसै दी अर्थ बवस्था 5 सब्बनें शा कमजोर अर्थ बवस्थाएं च ही पर हुन देस 5मीं सब्बनें शा बड्डी अर्थ बवस्था बनी गेआ ऐ ते तौलें गै त्री सब्बनें शा बड्डी अर्थ बवस्था बनी जाग। श्री ठाकुर होरें यूपीए सरकारै पर घोटालें पूंजीवाद दा पक्ख लैने आहली ते नीति पंगता दा आरोप लाया। उनें यूपीए दे कार्जकाल दौरान संविधान गी कमजोर बनाने दा आरोप बी कांग्रेस पर लाया। भाजपा दे सांसद बांसुरी स्वराज होरें आखेआ जे करसानें दी भलाई बेहतरी ते महिलाएं दा सशक्तिकरण सरकारै दी प्राथमिकता ऐ। उनें आखेआ जे प्रधानमंत्री किसान योजना तैहत अजें तोड़ी करसानें गी 3 लक्ख करोड़ रुपें शा बद्द तकसीम कीते जाई चुके न ते अनाज दे घट्टोघट्ट समर्थन मुल्लें च बी बाद्दा कीता गेआ ऐ। एहदे शा पैहले सदन दी कार्रवाई जिसलै रम्भ होई ते विपक्ख दे लीडर राहुल गांधी होरें नीट दे म्तेहान च होई दी कथित गड़बडी दे मुद्दे गी पुट्टेया। एहदे पर रक्षा मंत्री राजनाथ सिंह होरें आखेआ जे संसदी दी कार्रवाई नियमें पर आधारित हुंदी ऐ। उनें विपक्ष गी आखेआ जे कोई बी चर्चा राष्ट्रपति हुंदे अभिभाषण पर धन्नवाद प्रस्ताव परेंत गै कीती जानी लोड़चदी। विपक्षी मिम्बरें नीट पर सदन थमां वाकआउट कीता। राज्यसभा च अज्ज बडुलै जिसलै सदन दी कार्रवाई रम्भ होई सभापति जगदीप धनखड होरें विपक्षी मिम्बरें नीट म्तेयान च कथित गड़बडी गी लेइये दित्ते गेदे स्थगन प्रस्ताव गी खारिज करी दित्ता। राष्ट्रपति द्रोपदी मुर्मू हुंदे अभिभाषण पर धन्नवाद प्रस्ताव पर चर्चा रम्भ कीती। चर्चा च हिस्सा लैंदे होई विपक्ष दे नेता मल्लिकार्जुन खडगे होरें आरोप लाया जे एहदे च गरीब दलित, अल्पसंख्यकें लेई किश बी नेई हा। उनें पेपर लीक, ट्रेन हादसा, जम्मू-कश्मीर च आतंकी हमले ते होर मुद्दे बी पुट्टे। संसदीय कार्यमंत्री किरेन निजिजू होरें बी मुद्दे पर प्रतिक्रिया दिंदे होई आखेआ जे सब्बै प्रतिभाएं गी इक्क नेई थाहरै पर स्थापित कीता गेआ ऐ जित्थुआं लोक बेहतर ढंग्गै कन्नै इनेंगी दिक्खी सकंगन ते श्रद्धांजलि देई सकंगन। एहदे शा पैहले दौनें सदनें टी-20 विश्व कप जित्तने लेई भारतीय मर्दे दी क्रिकेट टीम गी बधाई दित्ती।

<><><><><><>

PM-Doctors Day

प्रधानमंत्री नरेंद्र मोदी होरें अज्ज डाक्टरें सरबंधी ध्याड़े दी सब्बनें डाक्टरें गी शुभकामनां दित्तियां न। श्री मोदी होरें सोशल मीडिया पोस्ट च आखेआ जे एहू ध्याड़ा देसै दे सेहत सेवकें दे समर्पण ते करूणा दा सम्मान करदा ऐ।

श्री मोदी होंरें आखेआ जे सरकार देसै च सेहत सरबंधी बुनियादी ढांचें च सुधार ते डाक्टरें गी सम्मान प्रदान करने ताई पूरी चाल्ली बचने बज्झी दी ऐ।

<><><><><><>